

Minister Sevinger

“Realisacion di Watty Vos Boulevard ta pone fin na espera di 30 aña y inicio di un era nobo den Infraestructura”

ORANJESTAD – Watty Vos Boulevard, cu ta mucho mas cu un ringweg, ta birando realidad. Fin di e luna aki, segun un anuncio haci door di Prome Minister Mike Eman y Minister Benny Sevinger, trabou ta bay cuminsa. Esaki ta un di e 4 proyectonan grandi, cu tabata mas di 30 aña den preparacion, cu a wordo realisa door di Gabinete Mike Eman I y II.



“Cu e proyecto aki Aruba ta cuminsa y cera un capitulo. Cera e capitulo den un caso di 4 proyecto cu Aruba a bin ta traha riba nan pa e ultimo 30 añanan, di cual e ultimo ta Watty Vis Boulevard cu ta den cuminsa.” Minister Benny Sevinger a bisa den conferencia di prensa. E mandatario a repasa e historia di entre 20 pa 30 aña cu a bin ta papiando riba mudamento di haf, construccion di un hospital nobo, e caminda di 4 via pa San Nicolas y e ringweg (Watty Vos Boulevard). Aunke cu e proyecto a cuminsa caba, pa fin di luna tin e ceremonia oficial di inicio di e proyecto cu ta wordo realisa door di e empresa Mota-Engil.

Watty Vos Boulevard (WVB) ta un proyecto un poco diferente cu Green Corridor, cu tin hopi zona berde na banda di caminda. WVB ta pasa den diferente bario y e areanan na banda lo wordo desaroya economicamente. A cuminsa cu e proyecto casi 30 aña pasa ora cu a cuminsa cumpra terenonan y awor Gabinete Mike Eman I y II a dicidi di ehecuta esaki y a cuminsa traha riba su realisacion na 2013. Pa esaki, Minister Sevinger a splica, a busca y haya aprobacion di Parlamento. “Si bo mira entre 2013 y 2017 ta 4 aña a pasa di planeacion y buscamiento di financiamiento cu finalmente awor e ta den ehecutacion,” Minister Sevinger a splica.

Ta trata di un proyecto cu no ta encera solamente un caminda di 4 via cu ta sali for di aeropuerto bay Sasaki, pero cu tambe ta alivia e trafico na Playa. Tambe e ta drecha e caminda di Oranjestad pa Ponton, drecha e actual Sasaki te na Super Food, bay bek na Boulevard bieu for di unda tabata ex Fatum te na Riu. Den esaki ta sigui cu e linear park, conectando riba e parti cu tin caba na Playa. Tur esaki ta consisti di 5 fase. E proyecto aki ta esun mas grandi di Infraestructura, cu no solamente ta cambia infraestructura pero tambe calidad di bida di e habitantenan. Principalmente si mira cuanto hende ta uza e caminda aki den fin di siman pa haci ehercicio.

Tambe tin conexionnan nobo, entre otro rotondo y fly-over, cu lo percura pa trece seguridad y un milho fluho di trafico. E proyecto aki ta inclui un linea pa bicicletanan, cu lo core for di Boulevard, pasa den Watty Vos Blvd, drecha e caminda di 4 via te na San Nicolas. E lo percura pa hopi mas movicion di ciclistanan riba e camindanan aki, algo cu Gobierno ta promove pa mantene e ciudadanonan den un estado saludabel.